

Jekamba maifu Pol Timotinjik or kayeri

1 ^aAn Pol anira, jekamba kason mir Timotinjik amu kayenduwa. Avui Wasilaka fre Krais Jisas anin aposelik fri kamashihindak lerawu frihin amu landuwa. Avui Wasilaka nирin jivinahanda ma ria. Krais Jisas ermba ermbak linda oson handa ma ria. Frir mu anin fri kamashihindak lerawu frihin amu landuwa. ^bTimoti, an nga mir nga Kraisin nakrem shi tiyaha an nanda hom mi nawa osik mir jikisi anhi mira. Mirnjik Avui Wasilakan a sawenak or nga Krais Jisas Wasilaka nihi nga waprupshi frihi nga holo frihi nga waphimbiji frihi nga avak fri halashinak mihik si naka.^a

Welmbahalaha maintarmben sawenda ma ondon ji auheyeka

³Os provins Masedoniak a ikuri wolo karem mirin amu sawera, “Mai, yanga Efesus orok er lihi ma ol welmbahalaha maintarmben sawenda ma ondon kwambuk pantleshinak os erem li sawendan li halaka.” ⁴Ma ondo mbele mbele ol mas misumu lihikop sishi naha rahanda mashin li sawewak ma olmu lihi ambek anajinduwa. Hako os erem li sawenda nombo oso mbeek man jelyashiwak kwambuk li sihi Avui Wasilakan li hishinda nombo lihi kwambuk nakwa ambu sir, wahau. Karem nanda osik lirin pantleshinak er li halaka.^b ⁵Os a hishihi na mbawa karem, Jisasin tiyanda ma ondo halanak lihi ambek li anarupshika. Uhu anarupshinda lihi oso halanak wornakop er si naka. Uhu halanak kavakava ol li undan ermba ermbak Avui Wasilakan li sawenak or laha ermbeshinak jivik li naka. Uhu Jisasin tiyanda nombo lihi wavu namtaskop si naka. ⁶Hako welmbahalanda ma ondo nombo wornan tiyandan angop li halawa sir. Uwak wavu lihi angop si fenjeshiwak olmu maintarmben saweyanduwa. ⁷Lir Moseshi lon sawenda mak li nakmbaha hishinda ola. Hako mbeek lo oson hishiyarinda ambu lir, wahau. Men li mbafirihi li mba, “Lo Moseshi karem nanda sir,” karem mbanda ola. Hako lir mbeek lo oso maintontlo sihin yarinda ambu lir.

^a 1:2 Ap 16:1-3; Ta 1:4 ^b 1:4 1 Ti 4:7; Ta 1:14

⁸ Hako angop ni heyenda sir, Moseshi lo oso jivi sira, os ni halashinak Avui Wasilaka mbahanda hom lerawun si lanahin.^c ⁹ Lo oso lerawu sihi mberem si nandu? Avui Wasilaka mberem ukurik lo oson or ewer? Ma jivin si tolo wornakmbaha eweri or mo ma kavan si tolo wornakmbaha eweri or? Ma kavan si tolo wornakmbaha eweri ora. Ma ol lo orhin mblarnaha ferfar unda, ma ol orin halaha kavakavan unda, ma ol mashi orhin mblarnaha mbele misambik fehen tolonda, ma ol avoko nijava lihin mandingormehe ma anandin er nga mandingormenda, ¹⁰ ma ol nokophirmbirik layinda, ma ol hulayi ambek nokove nga li liyanda hom unda, ma ol hulaima nokopman li lai ma anandin haha yan landa, ma ol mbafirimbaha mba, "Avui Wasilaka or heyewak mashi kas a mbawa ome sira." Hako men mbafirimbanda lir. Uhu ma ol mbele mbele amber Avui Wasilakahi mashin mblarnanda. Ondonjik lo oson ormu ewera. Maintontlo os lo oson or eweri karem. Or eweshinak mbele mbele kavakava os ma li uwan avak si muku si mba, "Kaso kava sir, mbeek mashi Avui Wasilakahi nga nakrem nanda ambu sir." Karem si mukukmbaha lo oson ormu ewera. ¹¹ Mashi kas jirin a sawewa kaso mashi jivi Avui Wasilakahi os nirin or hahandari nga nakrem nanda sir. Mashi jivi orhin anin or hashihindak hulaima nokopman a sawekmbahan. Or Wasilaka mende ria. Uwosik hi orhin ni hauoweka.

Pol hi Avui Wasilakahin or hauoweri

¹² Wasilaka nihi Krais Jisas anin or kamaha kwambu orhin or hashhindak lerawu orhin amu landuwa. Uwosik armesarme mendek orin amu mbanduwa.^d ¹³ Hako ome sira. Mas wavun a tormble namber, orin a okolehe wutari orhik a na ha ma orhin a jila mandingormelakurik a undari nir. Hako os erem a urik or heyeri mbeek orin wavu anhik a ewehe orin yawur a heye krahakorori ambu nir. Undari osik anjik or holoho anin ormu jivinara.^e ¹⁴ Wapjivi orhi os anin or hari oso wasilaka mendek nari sir, kasai uku si rasaha hoje ngoronda hom si nahanda osik mbeek sainanda ambu sir. Wapjivi orhi oso anhik si na ha si ushiwak orin sunguwavu anhi nga na hishiwehe hulaima nokopman a rupshihi orin amu toltambana sinduwa, os liri mik si oho sinda hom Krais Jisasik amu sinduwa.

¹⁵ Krais Jisas misambi torok nir kavakavan undari man or jivinakurik tari ri. Mashi kasu omendinga sira. Uwosik ni misihi ni tiyaka. Hako an mas kavakava warje mende nga na undari nir. Kavakava os a undari mbeek ma lar erem undahi ambu ri, wahau.^f ¹⁶ Hako Krais Jisas mbeek ma ol kavakavan undan kolomalok kumasi mendenda ambu ri, wahau.

^c 1:8 Ro 7:12,16 ^d 1:12 Ap 9:15; 1 Ko 15:9-10; Ga 1:15-16 ^e 1:13 Ap 8:3; 9:1-5

^f 1:15 Lk 19:10

An kavakavan warje mende nga na undari nir. Hako Jisas Krais anin or jivinashihindak ma amber avak li heyeha li krahakoroka, or mbeek ma ol kavakavan undan kolomalok kumasi mendenda ambu ri. Oson li heyeha lir nga avak orin wavu lihik li ewendanak ermba ermbak linda oson livai laka.¹⁷ Avui Wasilaka malakama ermba ermbak linda ri. Hako nir ma misambik fehe mbeek orin ni heyendahi ambu nir. Ortonom God indingaria. Uhunda osik nir amber hi orhin ni hauowenak or malakama nihik er or naha lika. Ome sira.

¹⁸ Jikisi anhi Timoti mirin, profet mashi os mas li sawenda mainombo hom indik mirin amu sawenduwa. Unak mashi oso korme sayi hom mi toloho avak awun jip uka. ¹⁹ Mir avak os Kraisin mi tiyanda nombo nom er toltagrika. Uhu mbele os jivik nanda nga os kavak nanda nga armek yarika. Uhu jivik nanda nom er tiyaka. Misi, ma lal nombo kavak li siwan angop heyeyariwa lir. Hako lir mbeek Avui Wasilakan li halashiwak lirin tolo wornanda ambu ri. Uwosik nombo kava orok er li iwak Jisasin li hishiowenda nombo lihi angop mendek nawa sir, os sip solwarak si ihi sunja lakak si jindirihi si lunlandu rakanda hom. ²⁰ Ma lihi lap Himeneus fre Aleksander erem nanda vri. Unda osik fririn Laulakahi tavak a halashihindak opmu sinduwa. Erem a ushinak os erem fri unda kava frihi fri heyeha, os mashi Avui Wasilakahin fri mblarnaha orin fri okolendant, er fri halakmbahan.^g

Nir avak Avui Wasilakan ni sawenak ma amber or jelyaka

2 ¹Misi, mirin a sawekwa karem, ma ondon sawenak lir ermba ermbak Avui Wasilakan armesarmek li mbaha orin li saweka. Ma amber ondonjik li sawenak orvai lirin jelyaka. ²Uhu malakama nga ol gavmanhi lerawun landa ondonjik er nga li sawenak lerawu os li landan or jelyaka. Ushinak mbeek nomorawu las nihik talakwa ambu sir. Unak avak nir amber jipjip ni lihi Avui Wasilakahin nombon ni tiyaha os or mbawa hom ni uka. ³Nombo os erem orin ni sawenda nombo oso misokome orhik or heyewa jivik si nawak rupshinda ri. ⁴Or hulaima nokopman jivinahanda ma ri. Ma amber or jivinakmbaha hishinda ri. Ushinak mashi orhi oso mainome sihin yawur li heyeha krahakorokmbahan. ⁵⁻⁶Angop ni heyenda sir, God namtar nom linda ria, or Avui Wasilaka nihi oria. Hako or mbeek ma misambik fehe nga nakrem lindari ambu ri. Or orhik or lirik, lir lihik lindari lir. Uhu wutarik nandari lira. Hako os or mbahandari wolok si narik Krais Jisasin or halashirik Krais orhink fleya hom maome orhin or hashirik li mandingormeshirik os wutarik li nandari oso osmu mendek nara. Krais suman or tivihi hulumangok or sishirik wutarik li nandari osmu

^g 1:20 1 Ko 5:5; 2 Ti 4:14-15

mendek nara. Os Krais erem or uri oso osmu mukunduwa, Avui Wasilaka ma amber or jivinakmbaha hishinda ri.^h ⁷Anin aposelik or kamaha mashi orhin anin or hashinak a ihi ma ol mashi orhin mbalarnanda ondon a sawekmbahan. Lirin a saweshinak Jisasin wawu lihik li ewehe mashi omendinga orhin li tiyakmbahan. Unda mashi kas a sawewa kaso omendinga sira, an mbeek a mbafrimbanda ambu nir.ⁱ

⁸Ji misi, os ji tirsaha ji lotu uwa wolo hulayi jirin, tavan ji lalawuhu Avui Wasilakan ji saweka. Uhu wawu jihin orin ji haha ma worna mak ji naka. Uhu os ji waplelenaha anangriyandan er ji halaka. Uhu ermba ermbak orin ji saweka.

Pol mashi kwambu kason nokopji li sikundari nombon or saweri

⁹Mashi las jir nokopjin a sawekwa karem, kowen armek ji faleka. Jir avak masikukwa jiji nga maome jiji nga mbele mbele ya lakak li frungawunda ondok ji tlahapsikwak ji hishombashiowewa hala. Uhu kowe ya lakak li frungawundanjik ji mbawa hala.^j ¹⁰Hako halanak nokove ol Avui Wasilakah mashin tiyanda ondo lerawu jiviwavi nom li laka. Unak os erem li uwa nombo oso si unak jele mendek li naka, os lihinjik li tlahapsinda hom.^k ¹¹Nokopji jirin ji misi, Avui Wasilakah mashin li sawewa wolo mayam armek ji misihi ji hishiyarika. Mashi os li sawewan ji misihi lihi siyok ji sika. ¹²An mbeek a halashiwak hulayi nokopjih siyok li siwak nokopji Avui Wasilakah mashin lirin sawenda ambu lir, wahau. Halanak nokopji men mayam li lihi li liwanganika.^l ¹³Mberem ushiwak? Avui Wasilaka Adamin masmas or ushihikop Ivin or uri sir.^m ¹⁴Ushirik Adam mbeek Laulakah mashin masmas misiri ambu ri. Hako Iv oso mu mashi oson misihi Avui Wasilaka fri ukmbaha nor mbahandari ambu oson ura.ⁿ ¹⁵Undosik halanak nokopji jikisin li waka. Uhu os Jisasin sunguwawu lihik li ewehe ma amber li rupshihi nombo jivin li tiya nahi, avak Avui Wasilaka lirin or jivinakwa lira.

Wasman nga dikon nga ma worna mak er li naka

3 ¹Omendingak jirin amu sawenduwa, os ma lar wasmanik or nakwak or hishi nahi, or lerawu jivin lakwak hishinda ri.^o ²Halanak ma or wasmanik nakwak hishiwa ma oto nombo jivi nom or tiyanak hulaima nokopma misokome lihik li heyenak mbeek mbele kava las orhik nanak li heyekwa ambu sir, wahau. Or avak nokove namtas nom or laka. Uhu nor ruwol tava oloho nor lika. Ma ol aka orhik tawan armek or uka. Uhu Avui Wasilakah mashin yawur or ewesaweka.^p ³Uhu uku

^h 2:5-6 Ro 3:29-30; Ga 1:4 ⁱ 2:7 Ap 9:15; Ga 2:7-8; 2 Ti 1:11 ^j 2:9 1 Pi 3:3-5

^k 2:10 1 Ti 5:10 ^l 2:12 1 Ko 14:34 ^m 2:13 Stt 2:7,21-22; 1 Ko 11:8-9 ⁿ 2:14 2 Ko 11:3; Ga 3:1-6 ^o 3:1 Ap 20:28 ^p 3:2 Ta 1:6-9

kavan or awan or hala. Ya mendenjik or hishombashiowewan or hala. Uhu nombok waplelenaha awun unda nombon or hala. Hako halanak yawur or hishiyarihi man naman nalok mbaha tolo wornanda mak or naka.⁴ Halanak jikisnokopji orhin armek or uhu jikisi orhin armek or ewesaweka. Erem or ushinak orhi mashin li misiwa, mbeek li mblarna ermbekwa ambu sir.⁵ Hako os jikisnokopji orhi nga jipjip or una ambu nahi, wasmanik or nawa erema. Siosik maifuk or sihi lerawun or lawa nga mbeek jivik nakwa ambu sir.⁶ Ma or akri sunguwavun tormblewe ma oto kolok wasmanik ji kamawa hala. Mberem ushiwak? Las avak orhinjik or sihi samsamfa nor uyaha or takatukuyinda ngashi, Laulaka or takatukuyiri hom.⁷ Hako halanak Kraishi ma nga ma ol lotu unda ambu ondo nga ma otom li heyehe li mba, "Ma oto jivi mende ria." Os erem jivik or nanak li heye nahi ambu, Laulaka or unak takatukuyikwa ri.⁸

⁸ Uhu dikon ondo erema, ma worna mak li naka. Ushinak ma amber lirin li heye li mbaka, "Ma ondo jivi lira." Lir avak tarvle teng anda hom li nawan li hala. Uhu uku kavan li awan li hala. Uhu man li haimba handambaha ya lihin li lakwak li hishiwan li hala.⁹ Halanak kavakava ol li undan ermba ermbak Avui Wasilakan li sawenak or laha ermbekwa lir. Uhu avak mashi Avui Wasilakahin er li toltingrika.¹⁰ Jir siosik fehenda ma jirin, avak lerawu os li lawan ji heyeka. Am jivik nandas mo wahau? Os jivik si na nahi, halanak dikonik li naka.¹¹ Hovok nokopji erema. Mashi worna nom li mbanak ma amber lirin li heyehe li mba, "Nokove ondo jivi lira." Hako halanak mainsungu mashin mbaha maimpong ishitolowa li hala. Uhu halanak yawur li ruwol tava oloho lerawu os li lawan wornak er li laka.¹² Dikon nokove namtas nom or laka. Uhu jikisnokopji orhin armek or uhu nor ewesaweshinak mashi orhin li misihi li tiyaka.¹³ Os dikon lar lerawu jivin or la nahi, avak ma amber orin li lafaumba faushinak kopshak or sitambanaha Kraishi mashin or sawekwa mbeek ajekwa ambu ri.

Kraisin ni tiyanda nombo mberem sivai nandu?

¹⁴ Mashi kason mirnjik a kayehe kolomalok mirin a ra heyekmbaha amu hishinduwa.¹⁵ Hako os kolomalok a ra nahi ambu, mashi kas a kayewa yokon heyeka. Uhu avak mi yarikwa sir, Kraishi lerawun landa ma ondo mberem mberem li nandu. Nir Avui Wasilaka ermba ermbak linda orhi ma nira. Uhu nir sios orhi nira. Wormbonawa akan si toltingrinda hom kumdik ni sihi mashi ome orhin ni saweshiwak sios orhi mbeek tlehe rakanda ambu sir.¹⁶ Ome sira bilip nihi karem nanda sir,

Jisas Krais ma indingak or narik hulaima nokopma li heyeri ri.

Or ma worna ma indinga ri. Masikome Avui Wasilakah mu os

^a 3:7 2 Ko 8:21 ^r 3:11 Ta 2:3

or nanda nombo oson or mukushirik limu heyera. Ushirik ensel nga li heyeri ria. Ushirik ma yanga yangak li ihi mashi orhin li saweshirik ma misambik fehe orin sunguwawu lihik limu ewera. Ushirik Avui Wasilaka orin hevenik ormu lalawura.^s

Ol haimba handambanda mashin sawenda ma ondon ji auheyeka

4 ¹Avui Wasilaka Masikome orhi kormbak karem sawenda ora, kumak mbele mbele mendek li nakuna ambe ambena wolo ma lal avak Jisasin li tiyanda nombon halakwa lir. Uhu ma ol wasimalengamba oloshiwak haimba handambanda ma ondohi mashin misindiyakwa lir. ²Ma ol mashin erem sawenda ma ondo haimba handambaha ferfar er mbanda lir. Uhu lir mbeek mbele os jivik nanda nga kavak nanda nga heyekrahakoronda ambu lir. Sunguwawu lihi angop sunjakombe hom nanda osik os li unda kava oson heyenda ambu lir. ³Ol erem nanda ma ondo, os li hulasih nokoplanda nombo nga, akwa lal li anda nga, pantlenda lir. Hako Avui Wasilaka akwa amber or uhunda jivi numbu lira. Unda osik ma ol orin hishewehe mashi orhin tiyawa ma ondo akwan li awa wolo, orin armesarmek li mbaha anda ola.^t ⁴Mbele mbele amber or uri ondo jivi numbu lira. Avak kava, karem ni mbawan ni hala. Hako orin armesarmek ni mbaha ni aka. ⁵Mashi orhi nga os orin ni beten unda nga si ushinak akwa ondo amber misokome orhik jivik nakwa lir.

Timoti, mir Kraishi lerawun landa ma indingak er naka

⁶Os mashi kas a sawewa kason Jisasin hishindiyanda man mi sawe nahi, mir avak Krais Jisas lerawu orhin landa ma jivi mendek nakwa mira. Ushinak lerawu os mi landa nga mashi os mi sawenda nga avak akwa hom mirin si jelyashinak kumdik er sikwa mira. ⁷Hako mir avak nijava laka si lishihi welmbahala mashin si mbanda hom li mbawa mashin misiwa hala. Hako avak funtlehavantle lerawun lanak, os mi liyawa mihi nga, mbele mbele os mi unda nga, misokome Avui Wasilakahik or heyenak avak jivik er si naka.^u ⁸Os maome nihin jipjip ni unak wasilakak si naha kwambu nga si nawa oso men misambi torok ni liwa wolo nирin jelyakwa sir. Hako os Jisasin ni hishindiyanda nombon erem ni unak kwambuk si naku nahi, oso jivindinga sira. Mberem ushiwak? Jisasin hishindiyanda nombo misambik ni liwa wolo nирin jelyanda sir. Uhundanak kumak ermba ermbak linda oson nivai laka. ⁹⁻¹⁰Mashi kas a sawewa kaso omendinga sira. Nir Avui Wasilakahik lerawun landa ma nir lerawu hava kavan ni laha nomorawu wasilakan nimu kishanduwa. Mberem ushiwak lerawu kason ni landu? Nir angop ni heyenda osa, Avui Wasilaka ermba ermbak linda oto hulaima nokopman

^s 3:16 Jn 1:14; 2 Pi 3:3; 1 Jn 2:18 ^t 4:3 Stt 9:3; Ro 14:6; 1 Ko 10:30-31 ^u 4:7 1 Ti 1:4

jivinahanda ma ria. Unda osik nir ni hishiwa karem, ma anandi nga os nir hishinda hom li hishindanak kumak os ermba ermbak linda oson livai laka.^v

¹¹ Mir mashi kason hulaima nokopman armek ewesawenak li tiyaka.

¹² Mir jikandak nawak li heyewa mir. Hako mbele mbele ol mi uwa ondo wornakop er uka. Os man mi ewesawenda nga, os mi liyanda mihi nga, os man mi rupshinda nombo nga, os Jisasin mi hishinda nombo nga, wavu mihi jivikop er nanda oso nga, halanak krahak er si nanak ma amber li heyehe mirin li tiyaka. Uhu os, "Mir jikanda mende," karem li mbawan li halaka.^w ¹³ Os kolok orok a ra nahi ambu, lerawu os mirin a sawenda oson er laka. Mashi Avui Wasilakahi os jekambak li kayehendan siosik er ritim uka. Uhu maintontlo sihin sawenak li misihi li tiyaka. ¹⁴ Mir avak indiyok hishika, os wasman mirin tavan li hauowehe mirnjik li beten uri wolo, ma lar profet mashik os kumak mi lakundarin or sawerik, Avui Wasilaka kwambu orhin angop or hari mir. Oson halashinak men si wawa hala, wahau. Orok er toloho lerawun laka.^x

¹⁵ Lerawu os mi lawan kwambu mende mihi nga armek lashinak krahak er si nanak ma li heyeka. ¹⁶ Mir avak mihinjik auheye, os mi liwa nga mashi os man mi sawewa nga. Uhu mir kopshan er mbaha mashin sishi saweka. Unak Avui Wasilaka avak mir nga ma ol mashin mi sawewak misinda ondo nga nor jivinaka.

Timoti, mir ma ol siosik fehenden samunda mihi hom tolo wornaka

5 ¹ Os avoko laka mbele kava las li uwak mi heyewa mi ihi lirin sawenak os li uwa kava oson li halaka. Hako lirin ngriawa hala, wahau. Os avui mihin mi tolo wornanda hom naman lirin tolo wornaka. Jikanda ermbasi erema, os mahasanje mihin mi tolo wornanda hom lirin tolo wornaka. ² Nijava laka erema, nijava mihin mi tolo wornanda hom tolo wornaka. Nokopminyongo erem. Os lirin mi tolo wornakwa wolo sunguwavu mihin halanak jip er si naka. Uhu jikanoka mihin mi tolo wornanda hom lirin tolo wornaka.

Nokove ol mumblak wayandan armek ji uka

³ Os nokove mumblak wayanda las jimasamunda ngashi ambu, sios avak sirin si jelyaka. ⁴ Hako os jikisi mo nira sihi am li sahanda nahi, ondon sawenak nijava lihi oson li jelyaha armek li ewe uka, os lir jikisakrik li narik nijava lihi lirin armek li uhunda hom avak wasan li uka. Os erem li uwa oso misokome Avui Wasilakahik osmu jivi mendek nanduwa. ⁵ Mumbla os ma nendekuvuk si nanda oso Avui Wasilaka nom hishiowenda sir. Uhu niri tandi ermba ermbak sirin or jelyakmbaha

^v 4:9-10 1 Ti 2:3-4 ^w 4:12 Ta 2:15 ^x 4:14 2 Ti 1:6

orin sawenda sir. Erem nanda mumbla oso mumbla indinga sira. ⁶Hako mumbla os ujamasaisaha kumba nukuk ai aik siwa oso sunguwavu sihi angop hahanda hom nawa sir. ⁷Karem uwosik ai ai, kas a sawewa kason mumbla ondo amber sawenak li auheyeho jipjip li lika. Las avak ma li raha lirin li ngrianda ngashi.

⁸Os ma lar or mba, “An Kraishi ma nir.” Hako avoko nijava mahasanje indinga orhi nga orhi ma anandi ondo nga nor jelyana nahi ambu, or Avui Wasilakah mashin mblarnanda ma indingo ria. Uhu orin tiyanda nombon angop or halawa sir.

⁹Mumbla ol asama lihi 60-in tikrihi hula namtarkop lindari ondo hi lihin jekambak kayeshinak sios avak lirin si jelyaka. ¹⁰Ma amber angop li heyenda ola. Lir nokove jivi mende lira. Jikisi lihin armek undari lir. Ma ol aka lihik tarin armek li uhu akwan handari lir. Uhu Kraishi ma kumba lihin yokondari lir.^y Uhu ma ol nomorawu nga nandarin jelyandari lir. Uhu mbele mbele lerawu jivi nom landari lir. Karem nanda mumbla ondo nom hi lihin jekamba orok kayeshinak sios lirin si jelyaka.

¹¹Hako mumbla nijava lakak nawa ambu ondo hi lihin jekamba orok kayewa hala, wahau. Mberem ushiwak? Hula lihi hashiwak, lir mbeek sunya hakwa ambu lir. Kraishi lerawu nom li la, karem mbanda ola. Hako er li liyaha li hulasikwak li hishihi Kraishi lerawu nom li lakmbaha li mbahanda os limu halanduwa. ¹²Uhu mashi os li mbahanda os limu rumawa. Karem nawa osik avak musa nga nakwa lir. ¹³Hako oso nom nembes. Aka akak li ilai tala ihi li yaha lerawun li lakwak os limu sauhombo mendenduwa. Ushihi maimbong ishitolonda lir. Uhu mashi kavakavan li mbakwa ambu os limu mbawa.^z ¹⁴Erem nawa osik a mbashinak nokopminyongok nawa mumbla ondo indiyok li hulasika. Uhu jikisi nga li naha hirava ukun laha akasuvun hakoho li lika. Os erem li u nahi ma ol Avui Wasilakan lotu unda ambu ondo mbeek mashi kava las lirin mbakwa ambu lir.^a ¹⁵Hako an a heyewa, mumbla lal angop nombo jivin li halaha Laulakah mak nawa lira. Karem uwosik mainkwambu mashi kason amu sawenduwa.

¹⁶Jir Jisasin tiyanda nokove jirin ji misi, sios avak mumbla ol ma nendekuvuk nanda ondo nom jelyakwa sir. Uwosik os jimatama jihi las mumblak si linda nahi, wa sirin ji jelyaka.

Siosik maifuk sihi lerawun landa man armek ji uka

¹⁷Avui Wasilakah mashin sawehe mukolsukolonda ma ondo lerawu havan landa lir. Karem uwosik lirin armek ji uhu lerawu os li landanjik wasan ji haka. ¹⁸Mberem ushiwak? Avui Wasilakah jekambak mashi las

^y 5:10 Oro wolok ma lar os aka lasik or tari wolo akamashama mbashirik ornjik lerawun landari ma lar ma or tari oto kumba orhin yokondari ri. ^z 5:13 2 Te 3:11 ^a 5:14 1 Ko 7:9

karem li kayeri sir. "Bulmakau wit sijin li esnerkowa wolo suwambushi lihin ji ishi arangowa hala. Halanak wit siji kal li aka." Uhu mashi las nga karem li kayeri sir, "Lerawu os ji lawa avak akwan li hanak ji akwa sir." Karem uwosik jir erem, ma ol jirin mashin sawenda ma ondon armek ji uka.^b

¹⁹ Ji misi, os ma namtar nom or taha nor mba, "Wasman oto mbele kava las or uwak amu heyewa." Ma namtar nom erem or mba nahi, mashi orhin kolok misiwa hala. Hako os ma frijip, nalmingrip li raha erem li sawe nahi, mivai misika.^c ²⁰ Os ma lar kavakavan or u nahi, hulaima nokopma misokome lihik li heyenak kwambuk ngriasawenak kavakava os or undan or halaka. Erem mi unak ma amber avak li heyeha ajekwa lir. Uhu mbeek erem ukwa ambu lira.^d

Timoti, mir mihinjik auheyeka

²¹ Avui Wasilaka nga Krais Jisas nga ensel frihi er nga li heyewak omendingak mirin amu sawenduwa, avak ma lar jivinashihi lar kavanawa hala. Mashi kas a sawewan mi tiyaha ma amber hom nakremkop uka. ²² Mir avak lewas tava mihin ma larik hauowewa hala. Uhu kavakava ol ma li undan nakrem ji uwa hala. Mir avak mihinjik auheyeha lika. Ushinak os mi liyawa mihi oso avak misokome Avui Wasilakahik jivik si naka.

²³ Sungu mihi ermba ermbak kavamisinda sir. Karem uwosik uksembemban awa hala. Hako wain uku kandakar er nga ngoroshihi mivai uksem aka. Ushinak sungu mihi si kavamisinda avak mendek si naka.

²⁴ Ma lal kavakava ol li unda kormbak li uwak ni heyenda lir. Uhu os nimu mbanduwa, "Ma rondo avak Avui Wasilaka kotim ukwa lir." Hako lal kavakava ol li unda wanyi unda lir. Hako os Avui Wasilaka man or heyembakwa wolo ol li unda kavakava lihi kormbak talanak ni heyekwa sir. ²⁵ Mbele mbele jivi ol ma li unda erema. Lal lerawu jivi os li lawa kormbak li lawak ni heyenda sir. Hako lal lerawu jivi siyok wayok landa lir. Hako kumakop kormbak si talanak ni heyekwa sir.

Akishmakisha ma ondo malakama lihi siyok li sika

6 ¹Jir Kraishi ma jirin, os akishmakisha kavak ji na nahi, malakama jihu orhi siyoko mendek ji sihi lerawu orhin armek ji laka. Os erem ji una ambu nahi, ma avak li heyeha hi Avui Wasilakahik nga mashi orhi os ni sawenda nga li okolehe mbakwa sir.^e ²Uhu malakama jihu os Jisasin tiyanda mak or na nahi, jir avak orhi mashin mblarnaha lerawu orhin ji hangusangu lawa hala, wahau. Halanak kwambu jihu mende nga lerawu orhin er ji laka.

^b 5:18 Mt 10:10; 1 Ko 9:9 ^c 5:19 2 Ko 13:1 ^d 5:20 Ef 5:11 ^e 6:1 Ef 6:5

Mberem ushiwak? Malakama jiji Jisashi mak or nahanda osik mahasanje jiji hom or nashiwak or jimu rupshi mendenduwa. Karem uwosik lerawu orhin armek er ji lanak mbele mbele orhi jivindingak li naka. Mashi kas mirin a sawendan ermiba ermbak hulaima nokopman sawenak li misika.^f

Ya mendenjik hishombashiowenda nombo oso jivi ambu sir

³⁻⁴ Wasilaka nihi Jisas Kris mashi ome orhi Avui Wasilakan ni tiyanda nombon sawenda sir. Hako os ma lar mashi oson or halashihi mashi anandi las or sawe nahi, wa ma oto mbeek mbele las yariwa ambu ri, wahau. Orhinjik men sembe menden yerkujih i yanda ri. Uhu mashi or mbawa sunguwavu mahin kavak nandahi mashin or mbawak ma amber lihi ambek limu anambli anamblarnanduwa. Uhu nombo os or uwa oso si unak ma lihi ambek li okolehe olmu anawapkava hishinduwa. Uhu ermiba ermbak anangriyanda nombo nom unda lira.^g ⁵ Ol erem nanda ma ondo mashi omendingan tiyanda ambu lir. Angop fendele mendenda olik karem hishinda lir, “Os Avui Wasilakah mashin ni tiya nahi, avak ya mbele mbele nga mushak ni nakwa nir,” karem hishinda ola.^h

⁶ Hako ome sira, os Jisasin ni tiyaha mbele mbele ol ni tolowa ondon ni heyehe ni mba, “Ambehoma. Os a lakmbaha na hishiwa ambehoma.” Os erem ni hishi nahi, ome sira, nir angop mbele mbele nga mushak ni nawa nir.ⁱ ⁷ Ni hishika, os njava nihi nirlin si wari wolo mbeek mbele lal nga ni laharakari ambu nir, wahau. Uhunda hom os ni hawa wolo mbeek mbele lal nga ni laha ikwa ambu nir, wahau.^j ⁸ Hako os akwa nga kowe nom nga ni na nahi, karem ni mbaka, “Ambehoma. A lakmbaha nor hawa ambehom, osira.” Karem ni mbaka. ⁹ Hako ma ol ya mendenjik hishombashiowewa ma ondo avak os li hishombashiowewa lihi oso si unak takatukuyikwa lir, os mbashi mambin li jereshiwak si rakajinda hom. Mbele mbele os sunguwavu mende lihi nga li lakmbaha li hishiwa ondo olmu lirin kavak nanduwa, os ma faheye ihi suwurinda mishik or iwak fa uksik si suwuri lalayiwak or uk anda hom. ¹⁰ Ome sira, yanjik hishombashiowenda nombo oso mbele mbele kava tontlo sira. Mberem ushiwak? Ma lal ya mendenjik li hishombashioweha Jisasin li tiyanda nombon os limu halawa. Erem li uwa oso os lihinjik masham kormek li jiji li entlembale misinda hom olmu nanduwa.^k

Timoti, mir mbele mbele kava ondon atamataweka

¹¹ Hako mir Avui Wasilakah ma mir, mbele mbele kava ondon er atamataweka. Mir avak Jisasin tiyanda nombon kopshan er mbaha sihi nomorawun kishaka. Unak Avui Wasilakah misokomek or heyenak ma jivik mi naha nombo wornan

^f 6:2 Fm 16 ^g 6:3-4 Ga 1:6-9 ^h 6:5 2 Ti 3:8; 4:4; Ta 1:14 ⁱ 6:6 Fl 4:11-12; 1 Ti 4:8;
Hi 13:5 ^j 6:7 Jop 1:21 ^k 6:10 Ef 5:5

er tiyaka. Uhu ma amber mi rupshihhi mashin naman tangrishi sawenak li misika.¹ ¹²Mir Jisasin tiyanda ma mira. Mir avak kwambu orhik esehe mbele mbele os mihih talawan sihi mblarnaka. Undanak kumak avak ermba ermbak linda oson mivai laka. Oson mi lakmbaha angop or kamari mir, os ma siosik fehenda li heyerik mi mbar, "Sunguwavu anhi nga Jisasin a hishewehe orin a tiyanda nira." Karem mi mbari wolo orok.^m ¹³Avui Wasilaka or mbele mbele ol ni heyendan uhunda ma ri. Krais Jisas or Pontius Pailathi misokomek or sihi mashin omek saweri ri. Or mbeek mbele las ajeri ambu ri, wahau. Fri heyewak mirin kwambuk amu sawenduwa.ⁿ ¹⁴Mir avak mashi Wasilaka Jisas Krais or mbahandan arme wornak er tiyanak or taka. ¹⁵Or Avui Wasilaka or mbahanda wolokop takwa ri. Avui Wasilaka orto nom lishinak mbele mbele ondo orhi siyokop sikwa lir. Or malakamak nanda malakama lihi ri. Or hiushamak nanda hiushama lihi ria.^o ¹⁶Or mbeek ma li handa hom handa ambu ri. Or ukruharanda nindik er linda ri. Unda osik nir mbeek orin ni heyenda ambu ri. Uhu mbeek pasir orhik ni ihi lafaukwa ambu nir. Ma lar mbeek orin heyenda ambu ri, wahau. Or ermba ermbak kwambu nga nanda ri. Uwosik nir amber hom ermba ermbak hi orhin ni hauoweka. Ome sira.

Ma jir ya nga mushak nanda jir, ma anandin ji jelyaka

¹⁷Ma ol ya nga mbele mbele nga mushak nanda ondon karem saweka, jir avak hi jihin ji hauowehe ji mba, "An mbele mbele musha ngashi nir. Mbele kava las anhik talakwa ambu sir," karem ji hishinan. Mbele mbele jihin ondo mbeek nambek naha jirin jelyakwa ambu lir, wahau. Hako karem ji hishika, "Avui Wasilaka orto nom anin jelyakwa ri. Ortonom mbele mbele jivin or hashiwak nimu rupshinduwa."^p ¹⁸Lirin sawenak mbele mbele jivin li uhu ya lihin li laha ma ol mbele mbele ngashi ambun li jelyaka. ¹⁹Os erem li u nahi, ambehoma, mbele mbele jivi os kumak li lakunda oso os fa rasaha hisufasuwu si faashiwak si sinda hom os limu erem unduwa. Uhundanak kumak ermba ermbak linda oson livai laka.^q

Timoti, lerawu os mi lawa nga os mi liyawha nga auheyeka

²⁰Timoti, lerawu os mi lakmbaha Avui Wasilaka mirin or hahandan auheyeka. Ma ol orhi misokomek or heyewak ferfar anamblarna yanda ma ondon avak pasir i lafauwa hala. Lihinjik karem mbanda ola, "Nir hishiyarinda wasilaka ngashi." Hako wahau, os erem li mbawa men semben mbayanda lir. ²¹Hako os erem li hishinda nombo oso osmu lirin toloho mbraharonduwa. Ushihi Jisasin tiyanda nombo angop li halari sir.

Jirnjik Avui Wasilakan a sawenak jirin or jelyaha waprupshi orhin jirin hakwa ria. Unda kasira. Ambehoma.^r

¹ 6:11 2 Ti 2:22 ^m 6:12 1 Ko 9:25-26; 2 Ti 4:7 ⁿ 6:13 Jn 18:36-37 ^o 6:15 Rev 17:14

^p 6:17 Lk 12:20 ^q 6:19 Mt 6:20